

TE HEHEURAA API

I neia i te piha neneiraa Univereti i Roto Miti i Utah no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa.

Nu. 5

Me, 1918

Mat. 12

E tae mai oia i te ao nei ia faaora i to'na ra mau taata, e rave oia i nia iho ia'na i te mau hara o te faaroo i to'na ra i'oa; o te feia ia e roaa ia ratou i te ora mure ore, e ore e taea te ora ia vetahi e mau taata.—Alama 11:40.

TE PEROPHETA MAU.

“Te peropheta ia tohu i te parau hau ra, ia tupu ra te parau a taua peropheta ra, e itea-mau-hia'i taua peropheta ra e na Iehova mau oia i tonono mai.” Ier. 28:9.

Ua tohu a'era Mose e e haapurarahia Iseraela e o te mau fenua'toa.

“E haapurara Iehova ia oe i o te mau etene atoa ra, mai te tahi hopea mai o te mau fenua ra e tae noa'tu i te tahi hopea o te fenua ra.” Deut. 28:64.

I teie nei anotau e farerei te ratere i te ati Iseraela i te mau fenua'toa o te ao nei; noa'tu te fenua e haerehia, tei reira te tahi mau ati Iseraela i te parahiraa. Ua tupu roa te tohu ra e ua itea Mose ei peropheta mau.

I teie nei tau heheuraa Evanelia hopea nei ua tohu a'era te peropheta ra o Ioseph Semita e e haaputuputuhia te feia maite a te Atua i te vahi ho'e i te fenua Amerika e ora'i ratou i te mau ati e roohia mai ai to te mau fenua'toa o te ao nei.

“E ua parauhia outou ei faatupu i te haaputuraa no to’u ra feia i maitihia ra, e faaroo hoi to’u ra feia i maitihia i to’u ra re’o e ore hoi e faaetaeta i to ratou ra mau aau; no reira ua tae atu na te parau i opuahia mai ò mai i te Metua ra, i haaputuhia ratou i te vahi hoê i nia i te aano no teie nei fenua, ei faaineine i to ratou aau e ia faaineinehia i roto i te mau mea’toa no te mahana e haponono mai i te ati rahi e te anoraa i nea i te feia hara.” Parau i heheuhia ia Ioseph Semita B. F. 29:7, 8. B. F. S. 28:2.

E i teie nei mahana ua oti te hanereraa o te tausani i te putuputu i te fenua ra o Roto Miti i Amerika mai ò mai i te mau ati e te mau pohe i te niniiraahia mai i nia i te mau fenua’toa, e itea-atoa-hia’i o Iosepha Semita ei peropheta mau.

Ua faatiahia te Ekalesia a Iesu Mesia i nia i te fenua nei i te tau hopea nei i te matahiti 1830 na roto i te ohipa a te peropheta ra a Iosepha Semita, e ua heheuhia te tahi mau faaueraa ia’na ra i neneihia i roto i te buka ra i parauhia i te Buka Fafau. Ua tonohia hoi te mau orometua i te mau fenua i te mau-matahiti atoa e a’o i te Evanelia e e faaara i to te ao i te mau ati e fatata mai nei. Ua parauhia hoi ratou e peehia ta ratou faaiteraa Evanelia i te tama’i e te roo tama’i, i te aueue fenua, i te o’e fenua, i te ma’i, e i vetahi atu â atoa mau pohe, e ite ia te taata e tae mai i te mau ati e roohia mai ai to te ao.

“E i muri a’e i ta outou faaiteraa e tupu mai ai te riri e te vahavaha i nia i te taata nei; i muri mai hoi i ta outou faaiteraa e tae atoa mai ai te faaiteraa no te aueueraa fenua, e tupu ai te uururaa i roto ia’na, e topa hoi te taata i te repo, e ore hoi e maitai ia tia mai i nia.

E tupu atoa hoi te faaiteraa no te re’o no te patiri, e te re’o no te uira, e te re’o no te Vero, e te re’o no te are miti i te haamaeeraa ia ratou iho i nia roa i to ratou ra mau otia.

E arepurepu hoi te mau mea'toa; e aehuehu hoi te aau no te taata, e tupu hoi te mata'u i nia i te taata'toa. B. F. 88:88-91. B. F. S. 85:25.

"O vau o te Fatu, ua riri au i te feia rave hara; te tapea nei au i ta'u Varua eiaha ia noaa i te taata no te fenua nei. Ua tãpũ ihora vau i ta'u ririraa e ua opua vau i te tama'i i te fenua nei, e taparahi hoi te feia rave hara i te feia rave hara, e tupu mai hoi te mata'u i nia i te taata'toa." B. F. 63:32, 33. B. F. S. 63:9.

E tupu hoi teie i rotopu i te feia rave hara, o te feia atoa, o te ore e rave i te 'o'e i tairi i to'na taata tupu, e horo tia ia ia Tiona ei ora. E haaputuhia mai hoi i reira no te mau nunaa'toa i raro a'e i te ra'i nei, e o te mau taata noa iho ia o tei ore i aro atu te tahi i te tahi." B. F. 45: 68, 69. B. F. S. 45:13.

Mai te reira tonoraa orometua matamua ra e tae noa mai i teie nei ua hope te ahururaa o te tausani orometua e rave rahi i tei tonohia i tera fenua i tera fenua e haapii i te Evanelia, e faaue i te mau nunaa'toa ia tatarahapa, e e faaara ia ratou ia maue ê atu ia Babulonia e ia putuputu ratou i te vahi i haapaohia e te Atua ei haaputuraa ia ore ia roohia i te mau pohe e fatata mai. E vau ahuru tiahapa te matahiti i teie nei a faaaraara-roa-hia'i to te ao nei ma te faaea ore.

I te matahiti 1831 ua heheuhia mai te parau i te peropheta tei faaite maira e te tia i ra te mau melahi i te parau tuuraa ia haere i raro e ooti i te fenua i te feia haapao ore o tei ore i farii i te maramarama o te Evanelia.

"E te tia i maira te mau melahi i te faaueraa rahi ia ooti mai i te fenua nei, ia haaputuhia te zizania ia tutuihia i te auahi e inaha, ua tairuru te enemi." B. F. 38:11, 12. B. F. S. 38:3.

I te matahiti 1893 a haamaitaihia'i te hiero i Roto Miti ua faaite atura te peropheta o Vilifori Vuturufa ua tuuhia

HISTORIAN'S OFFICE

Church of Jesus Christ of Latter-day Saints

47 East South Temple St.

taua mau melahi ra e te Atua ia haere mai i raro i te fenua e haamata i ta ratou ohipa.

Mai reira mai â aita te ao nei i ere i te tama'i e te ati. Ua tama'i a'era Amerika e Paniola, Iaponi e Taina, Bêrtane e Afarika, Iaponi e Rusia, Farane e Moroco, Turikia e Helene, Bugaria, e Serbeia, e Motonego, e Rumania te tahi i te tahi, Ua orurê hau Mexico e tae noa mai i teie nei â. E i teie nei ua ama Europa paatoa i te tama'i ri'ari'a rahi faito ore mai te matamua mai â. Te taputô nei â na basileia rarahi e 25 i te taputôraa a pohe ai. Ua parauhia hoi e mai te mea e haamaorohia teie nei tama'i rahi eita rea te tane e toe i Europa paatoa.

Te tupu nei te mau tohu a Iosepha Semita mai te tohu a Mose i tupu ra ei parau mau, e tia ia parauhia oia e o Mose atoa ei peropheta mau. O te tama'i râ, o te haamataraa ana'e ia o te mau peapea e tae mai i nia i te ao i teie tau hopea nei. Te vai atoa nei â te o'e fenua, e te ma'i, e vetahi atoa'tu â mau peapea.

Nahea tatou?

Eiaha ia peapea to tatou aau. A tia tatou i te vahi mo'a; ei hora ore tatou. Ia tae te mahana e fariu mai te aau taata i te Atua, e e tupu te haehaa, e e opua hoi te taata nei e haapao i te parau-tia, e mure ia teie nei mau ati e e monohia ia i te tau hau hanahana rahi. Isa. 11:1-9. 65:17-25.

A faaitoito hua i te raveraa i te mau ohipa maitatai atoa ia upootia te parau-tia i te fenua nei e ia tahuri-tumuhia te mau ravea ino a te mau enemi no te parau-tia ra o te hinaaro e haavî e e faatîti i te taata nei. I faarahi i te tatou aroha i te otare e te vahine ivi e tei roohia mai i te ati, e utuutu maite atu ia ratou atoa ra.

A faaara hoi tatou i te taata'toa peneia'e o te ora te tahi i ta tatou parau. E na reira noa'tu â.

TE TUMU I FAAROO AI AU E, E PARAU MAU
ANA'E TA TE BUKA A MOROMONA.

"Na roto i te parau vaha a na ite toopiti e te tootoru hoi e faatiahia'i te mau parau atoa ra."

Area, te Buka a Moromona ra, ua turuhia ia i te parau vaha a na ite hoê ahuru e ma hoê, e o Iosepha Semita, o te ahuru ma piti ia o te ite. Ua tapu ana'e ratou i ta ratou parau-tia e, ua ite mata mau, e ua fafa atoa ratou i te mau api auro ra, e taua mau api auro tei ite matahia e ratou ra e tei mirimirihia e to tatou ra rima, o te mau api auro ia no reira mai te iriti-raa-hia te Buka a Moromona i papaihia i nia iho ra.

Eaha ra ia te tumu i ore i tia'i i te hoê pae o outou i te farii i te parau tapu a taua na ite hoê ahuru e ma piti ra? E ore ia e tia ia parau e, ua hape to ratou ite-mata-raa i taua mau api auro ra. Te hoê o taua na ite hoê ahuru e ma piti ra, o Iosepha Semita ia, ua faaite mai oia ia tatou e i vai mau na taua mau api auro ra i roto i to'na rima e ua maoro na ava'e.

Ahiri taua mau api auro ra e aore i vai mau na i roto i te rima o Iosepha Semita, e tia anei ia ia'na ia mana'o e, te vai mau ra ia i roto i to'na rima i na ava'e huru maoro ra? Na te hoê taote paari i te fenua ra i Amarika e pahono mai taua parau ra ia tatou. Te na ô maira oia e, e ore roa e tia i te hoê taata ia mana'o e te vai ra te hoê mau api i roto i to'na rima, mai te mea e aore ia i vai mau na i roto i to'na ra rima.

Eiaha atu â ia, te vai atoa nei i mua ia tatou te hoê mau tapao rarahi e taua mau tapao rarahi ra, o te tupu-oioi-raa ia o teie nei maitai rahi i te ao taatoa nei mai te vî ore. Ahiri mai te mea e, ua haavare mai na ite hoê ahuru e ma

piti ra, ua faufaa ore ê na ia ta ratou ra parau tapu; aore râ i faufaa ore; ua fariihia ta ratou parau e te hoê mau taata e rave rahi mai te oaoa e te popou rahi.

Te na ô maira te hoê taata papai parau no te hoê haapao-raa ê: “E ore roa vau e faataa i te mau peropheta parau-tia e te feia faatupu ohipa maitai mai ia Iosepha Samita te huru e aore ra te mau taata rarahi o tei haamaitai i to tatou nei mau tiaraa mai ia Rousseau te huru, ei maamaa. Te feia upoo ino ra, eita ia ratou e faatupu i te ohipa, e mea paruparu ia e, e ore e noaa ia ratou te itoitono te faatupuraa i te ohipa maitai. Area Iosepha Semita ra, e ere oia i te maamaa: e taata maere rahi ra oia” Ua fa maira te hoê melahi ia’na ra e taua melahi ra, ua faaite mai oia ia Iosepha i te vairaa mau o te mau api no te Buکا a Moromona ra.

E ere anei ia i te mea tia ia mana’o e, te faaotiraa i te parau paari a taua taata ite ra, o te parau mau ana’e ia? Oia mau roa. Teihea te tau i faatia’i te taata maamaa i te hoê Ekalesia paari o tei faafariu mai i te mau taata paari e te ite i roto i ta’na ra haapaoraa? Aore roa tatou i ite i taua tau ra, no te mea, aore ia tau i vai na.

No reira, e homa e, te Ekalesia i faatiahia e Iosepha Semita ra, i raro a’e i ta te Atua ra faatereraa, o te Ekalesia paari mau ia. Ua faatupu-faahou-hia te basileia o te Atua ra i roto i teie nei mau mahana hopea nei, e taua basileia ra, aore roa ia i tae mai i roto i teie nei ao ia haamou-faahou-hia, e ore atoa ia e riro ia vetahi ê, e tia râ ia i te vairaa e a muri noa’tu. E taua cfai i ooti noa-hia ra, e aore e rima i ooti maira i te reira, o te Evanelia ia tei faatiahia e te Atua na roto i ta’na ra peropheta ia Iosepha Semita. Ua ite Daniela i te tupuraa o taua basileia atea ê ra. A taio na ia Daniela i te pene 2 irava 44, 45.

Ua itehia i roto i taua basileia ra te mau toroa atoa mai tei faatiahia e Iesu iho a parahi mai ai oia i rotopu i te

tamarii a te taata nei.

Ua titau hua'tu te feia paari ia noaa ia ratou te ite i te hoê a'e vahi iti hape i roto i te Buka a Moromona ra, e i te tau mau i mana'o ai ratou e, ua noaa ia ratou te vahi hape i titauhia e ratou ra, tuu atura ratou i te reira ia hi'opoahia e to te ao taatoa, e inaha, upootia ihora te Buka a Moromona e faufaa ore roa atura tē mau titauroa a te enemi.

E ore atoa e tia ia parau e, ua haavare te parau faaite a na ite hoê ahuru e ma hoê ra o tei ite mata roa i te mau api auro o te Buka a Moromona ra, Ia hinaaro outou i te ite e, e parau mau anei e e parau haavare anei te Buka a Moromona, eita outou e vaihihia i roto i te pōiri, te no ô maira te parau faaite i roto i te buka a Moroni i te pene 10 irava 4:

E o teie ta'u a'o ia outou na, ia itea teie nei mau parau ia outou, e ui atu i te Atua, i te Metua mure ore ra. i te i'oa o Iesu Mesia e, e parau mau anei teie mau parau, e aore anei; e ia ui atu outou mā te aau hinaaro mau, ma te mana'o papu, e ma te faaroo i te Mesia, na'na ia e faaite mai i te parau mau ia outou na roto i te mana o te Varua Maitai;

Te parau i parauhia e te Atua o tei faaitehia i nia nei no te taata o tei hinaaro i te ite i te parau mau, o te hoê ia parau maere rahi. E ore roa e tia i te hoê taata haavare ia faaite mai i te parau maere rahi mai te reira te huru. Eaha râ te tumu e ore e tia'i i te taata haavare i te faaite mai i te hoê parau maere rahi mai tei faaitehia i roto i te evanelia a Moroni i te pene 10 e te irava 4. Teie ia; ia faaite mai te taata haavare i taua parau ra, ua taa ia ia'na e e ore roa e tupu ta'na ra parau. O te taata mo'a râ ia o Moroni tei faaite mai i taua parau ra, e tavini mau ia no te Atua, e aore roa i hapa te tupuraa o taua parau ra i te taata o tei hinaaro i te ite i te parau mau. Ua noaa ê na i te taata o tei imi i te parau mau e e faaite mai te Atua ia'na i tei ani atu ia'na e e parau mau anei ta te Buka a Moromona, e ua noaa atoa mai nei i teie iho nei, te ite e e parau mau te mau parau i roto i te Buka a Moro-

mona e noaa faahou hoi te ite i te parau mau a te Buka a Moromona i te mau taata'toa o te ani atu i te Atua mai te aau hinaaro mau.

Te rahiraa o te feia e faahapa i te Buka a Moromona ra, o te mau taata ia o tei ore i taio i taua buka ra. I te fanau-raa te Mesia ra, itehia ihora te hoê fetia apî i nia i te ra'i i to te fenua ra i Asia, e o taua fetia apî ra tei riro ei aratai i na taata paari i te vahi i fanau ai te Mesia ra. Ua oti taua parau ra i te papaihia i roto i te Bibilia. Ua oti ê atoa atu na i te papaihia, hou a'e i fanau ai te Mesia, i roto i te Buka a Moromona te hoê parau tapao o tei riro ei parau faaite i te mahana e fanau ai te Mesia. A taio na i te evanelia a Helamana i roto i te Buka a Moromona i te pene 14:3, 4.

Ua ite mau anei to Amarika i taua tapao i faaitehia mai e Helamana ra? Teie ia te pahonoraa. Na te hoê taata papai parau paari rahi tatou e faaite mai, o Banacorofa to'na i'oa. Tei roto ia i te hoê parau tuatapaparaa no te fenua ra no Amarika o tei papaihia e Banacorofa, i te pene 566 buka 5. A tufaa atu ai te hoê taata i ta'na faufaa i rotopu ia'na iho e ta'na ra mau tamarii, te na ô maira oia:

"Tapea ihora vau i te hoê tufaa matamua ra na'u iho, horoa'tura i te piti o te tufaa na ta'u tamaiti matahiapo, tei te teina te toru o te tufaa e te mahana i tufaahia'tu ai taua faufaa ra, o te hoê ia tau i ite atu ai to Amarika i na râ e toru, oia hoi e toru hitiraa mahana, e i roto i taua na hitiraa mahana e toru ra, aore roa ia i tupu mai te piri i te pô."

Teie parau i nia nei o tei papaihia e Banacorofa ra, e ere anei ia hoê â huru parau o tei papaihia i roto i te Buka a Moromona i te buka a Helamana.

E homa tei anihia ia outou atoa na i te taio i te buka a Moromona, o te hoê ia parau mo'a i papaihia na tatou atoa.

Eraneta Rositera.

EIAHA E TAPOL.

I te tere-haere-roa i tera fenua i tera fenua ua itea te mau peu e rave rahi no te taоторaa taata nei. Te patu nei to te tahi mau fenua i te mau fare piri maitai; ua piri roa te mau haamaramarama e te mau opani, e aita i haapaohia te tahi peu ei faaô-tahirihiri-raa i te mata'i apî i roto ia au te mau piha ei parahiraa e ei taоторaa. Te faatia nei to te tahi mau fenua i te tahi piha no te fare ei taоторaa e mea opeapea na pae piha ra ia farara tahirihiri haere noa te mata'i apî e ati noa"e te piha nei, e ore roa'i te hau'a ino e te mata'i pê.

E mau fenua mahanahana te mau fenua moana e aita rea te fare maohi i piri roa, e ô noa'i te mata'i apî i roto i te piha taоторaa; aita râ te tahi pae taata e mauruuru maori râ ia hape te taоторaa, e no reira e tapoi ratou i te upoo i te vauvau roi a taoto ai. Eaha ia te hape ia na reira i te taoto? E vaiiho rii tatou i te pahonoraa e tae noa'tu i te hopea no teie nei parau, e na mua i te feruri i te uiraa e, Eaha ia te ohipa no te mata'i i hutihia ei aho i roto i te tino nei? Tera ia, ua haapaohia te pape e te Atua ei horoiraa i to rapae i te tino ia mâ e ia faaorehia te repo, e te mata'i ei horoiraa i to roto i te tino ia tamâhia te toto e ia afai-e-hia'tu te taero e te mea pohepohe noa no roto maira. E maa'toa ia te mata'i e te vai atura hoi ta'na ohipa, o tena na ohipa horoiraa râ, o ta'na ia ohipa rahi.

Te mata'i o te reva nei e mea anoihia ia. Ahiri ua faataahia e roaa mai ai i e maha huru mata'i tumu êê i parauhia ra e, o Oxo, o Nitro, o Caboni Acida, e o Ata Pape. Te vai atura hoi te mau mea tumu, e iti râ ia e e ore tatou e feruri i te reira i teie nei. E mau mea maitatai roa ia teie nei na mata'i tumu e maha nei ia anoihia ei huti i roto i te mahaahaa, e mea mea ino roa râ mai te mea ua faataahia e ua huhuti taitahi noa. Mai te mea ua huhuti i te Oxo ana'era e araara roa"era te tino, e hitimaue i te oaoa, e e hau-tiuti roa ia, eita e maoro e pohe roa i te rohirohi no te puai

rahi o te hautiutiraa. Ia huhuti i te Nitoro ana'e ra, ua paopao roa te aho a pohe roa'tu ai, e ia huhuti hoi i te Caboni ana'e aita i anoihia ra, ia taea te ahuru o te minute ua pohe roa.

Mai te mea e tutuihia te ruru vahie e oomo i roto i te hoê farii i te Oxo ana'e ra e ura roa ia e e pau vave, no te puai rahi o te amaraa. Ahiri e oomohia te ruru vahie ura i roto i te hôe farii i te Nitoro e aore râ i te Caboni Acida e tinai-vave-hia ia te auahi.

Ia hutihia te mata'i i roto i te mahaahaa ua taa ê ua tumu ra e ua anoihia te Oxo i te maa i roto i te toto, e e huru au ta'na ohipa i reira i te taauahiraa i te vahie, e tupu ai te mahanahana tino nei. Ua tapeahia ia te Oxo i roto i te tino e ua pupuhia te Caboni i anoihia i te repo e te taero no te toto i rapae. Mai te mea ua rahi te taero i roto i te tino ua hau'a ino te aho i pupuhia ra. Ua na reirahia te toto i te horoihia e i te tamâhia e te mata'i i hutihutihia ei aho.

E teie nei, eaha te mea e ere i te peu maitai ia tapoi i te upoo i te ahu roi a taoto ai? Ua itea ia i roto i te parau i nia"e e ia hutihia te aho ua faataahia ia te mata'i i roto i te mahaahaa, ua tapeahia te Oxo i roto i te toto e ua pupuhia te Caboni i anoihia i te taero e te repo no te toto i rapae au. E ere ia te Caboni ana'e ra i te mea maitai ia huti ei aho, e tupohe ia te taata, e mai te mea e tapoihia te upoo i te ahu roi eaha te ravea e pee ê atu te Caboni taero e e noaa mai ai te mata'i apî maitai? Aita ia ravea. E hutihuti-faahou-hia te Caboni ei aho no te mea ua tapeahia i raro a'e i te ahu roi e e na reira-noa-hia'tu â. Ia poi-poi a'e, e teiaha e e taupupu te tino, e araara taiata ia te feia e na reira i te taoto, e ia pinepinehia ra e roohia i te ma'i. A ara, e ia paari.

Farani Tuterera.

TOAE A MAERE, Faaau Parau, Rue Dumont d'Urville, Orovini, Papeete, Tahiti.
ERNEST C. ROSSITER, Imprimeur, Rue Brea et de la rue Damont d'Urville, Papeete, Tahiti.